



Manu-falur hakarak atu kanta

Manu-falur lakon ona nia lian hodi hananu múzika sira. Nia sente frustadu tebes. Mai ita lee atu hatene tansá nia labele hananu nia múzika sira!



Manu-falur hakarak atu kanta
Meheruba Nisha

Let's Read



The Asia Foundation



Iha tempu uluk liubá, iha manu-falur metan ida. Nia hananu knananuk mesak furak kona-ba klima nian iha rai Bangladesh.



Nune'e, iha Baishakh, fulan dahuluk iha tinan ida-ne'e nian, manu-falur sente moras teb-tebes. Teki-teki, nia labelle hananu fali tan! Nia triste loos.



Iha fulan Jaishtha, haas sira no kulu-jaka sira komesa tasak. Manu-falur hakarak atu hananu tuir ninia hakarak! Nia semo husi ai ida ba iha ai seluk, koko no koko hodi hananu knananuk furak sira. Maibé, laiha lian ida sai husi ninia garganta.



Tempu bailoron too ona. Ai-hun Shimul, haree manu-falur triste hela. Ai-hun ne'e hatete: "Agora klima manas teb-tebes. Loos duni, ne'e mak razaun ó labele hananu. Hein de'it too tempu udan! Udan boot sei komesa hafoin ida-ne'e, no udan nia tarutu sei ajuda ó hananu mós."



Tempu udan too ona. Udan mai boot no maka'as teb-tebes durante fulan Ashar no Shrabon. Mota sira, bee-dalan sira, lagoa (bee nalihun boot sira) no toos sira nakonu hotu ho bee.



Ai kadam komesa nafunan ho sanak ne'ebé kór kinur no kabuar. Manu-
falur semo iha udan nia laran husi ai ida ba ai seluk, hodi buka nia lian.
Maibé nia labele hananu nafatin.



Tempu udan remata. Komesa ho tempu rai-maran durante iha fulan Bhadra no Aswhin. Ai-funan Kash mutin komesa nafunan. Rai sira nakonu ho pétala ai-funan nian.



Nu'u fuan sira ne'ebé mak tasak hotu ona belit metin iha nia hun. Manu-falur koko atu hananu ho ninia furak sira. Maibé hanesan, nia nafatin labele.



Nune'e too ona tempu ikus ba rai-maran nian. Agrikultór sira komesa halibur ona foos foun sira durante fulan Kartik no Agryahayan. Maibé manu-falur nafatin labele hananu iha kolleita (halibur foos) ne'e, ba iha festa Nabonno nian. Nia sente frustradu (triste) teb-tebes!



Tempu malirin komesa too daudaun ona iha fulan Poush no Magh. Klima troka hodi sai malirin liután. Ema barak koko atu hamanas sira-nia aan iha loro-matan.



Inan-feton sira komesa halo masin-midar husi ai-palmeira ninia been. Sira halo dosi midar sira. Ai-tahan sira komesa monu husi nia hun. Toos sira komesa nakonu ho ai-funan mostarda kinur sira. Tinan ida-ne'e mós besik atu remata ona. No nafatin, manu-falur labele hananu. Nia komesa atu tanis. Saida mak sei akontese se knananuk hirak ne'e lakon mohu hotu?




Too ikus, tempu rai matak nian hahú. Ida-ne'e mak fulan rua ikus iha tinan ida-ne'e, Falgun no Chaitra. Ai-tahan sira komesa nadikin ona iha ai-hun sira. Ai-fuan sira komesa okir iha haas-hun sira. Bani sira komesa semo no hananu.



Bani sira-nia knananuk lian mai too iha manu-falur nia tilun sira. Manu-falur koko hananu, iha ikus la susesu. Maibé bani sira-nia knananuk kontinua no la para. Sira hananu knananuk no ba knananuk. Tan ne'e, manu-falur mós hakarak koko hodi hananu nafatin. Iha ikus, nia hetan lian ida. Hafoin ne'e, hakilar!



No iha ikus, manu-falúr hananu duni knananuk badak ida. Ninia esforsu durante tinan ida nia laran, la saugati ida! No agora, manu-falur koñesidu hanesan manu ba tempu rai-matak nian. Wainhira ema husi rai Bangladesh sira rona ninia knananuk ho melodía ne'ebé furak, sira hatene katak tempu rai-matak komesa too daudaun ona.



REMATA!

Endorsed by:
The Ministry of Education, Youth and Sport, Timor-Leste



Supported by:



Brought to you by

Let's Read is an initiative of The Asia Foundation's Books for Asia program that fosters young readers in Asia and the Pacific.

booksforasia.org To read more books like this and get further information, visit letsreadasia.org.

Original Story Cuckoo Wants To Sing, Author: Meheruba Nisha.

Illustrator: Biplob Chakroborty. Published by Room to Read,

<https://storyweaver.org.in/stories/38525-kokila-gaibe-gana> © Room to Read. Released under CC-BY-4.0.

This work is a modified version of the original story. © The Asia Foundation, 2020. Some rights reserved. Released under CC-BY-4.0.

For full terms of use and attribution,

<http://creativecommons.org/licenses/by/4.0/>